

涵芬樓古今文鈔

呂景端
書藏

涵芬樓古今文鈔

卷一百一十五
書牘

涵芬樓古今文鈔卷二目錄

論辨類

論上二

機論上 馮用之

權論下 馮用之

秦穆諡繆論 皮日休

漢斬丁公論 皮日休

君臣論 徐鉉

持權論 徐鉉

師臣論 徐鉉

勸農論 高錫

斷論 田錫

封建論 廖 併

洪範論 廖 併

近名論 范仲淹

鼂錯論 文彥博

本論 歐陽修

朋黨論 歐陽修

爲君難論上 歐陽修

爲君難論下 歐陽修

泰誓論 歐陽修

縱囚論 歐陽修

五代史吳越世家論 歐陽修

五代史十國世家論 歐陽修

五代史雜傳論 歐陽修

漢論上 石介

漢論中 石介

漢論下 石介

陰德論 石介

賞罰論 劉敞

患盜論 劉敞

叔輒論 劉敞

治戎上 劉敞

治戎下 劉敞

賢論 劉敞

救日論 劉敞

功名論 司馬光

葬論 司馬光

漢中王卽皇帝位論 司馬光

知人論 司馬光

衡論 蘇洵

管仲論 蘇洵

易論 蘇洵

樂論 蘇洵

詩論 蘇洵

書論 蘇洵

明論 蘇洵

春秋論 蘇洵

諫論上 蘇洵

諫論下 蘇洵

洪範論 三首 蘇洵

洪範後序 蘇洵

譽妃論 蘇洵

辨姦論 蘇洵

材論 王安石

周公論 王安石

禮論 王安石

三聖人論 王安石

唐論 曾鞏

漢文帝論 曾鞏

留侯論 蘇軾

論隱公里克李斯鄭小同王允之 蘇軾

武王論 蘇軾

孔子從先進論 蘇軾

刑賞忠厚之至論 蘇軾

論始皇漢宣李斯 蘇軾

周公論 蘇軾

伊尹論 蘇軾

荀卿論 蘇軾

韓非論 蘇軾

始皇論 蘇軾

賈誼論 蘇軾

鼂錯論 蘇軾

大臣論上 蘇軾

大臣論下 蘇軾

禮以養人爲本論 蘇軾

既醉備五福論 蘇軾

詩論 蘇軾

禮論 蘇軾

論閏月不告朔猶朝於廟 蘇軾

宋襄公論 蘇軾

屈到嗜芰論 蘇軾

論養士 蘇軾

論周東遷 蘇軾

論商鞅

蘇軾

范增論

軾

涵芬樓古今文鈔卷二

侯官吳曾祺纂錄

論辨類

論上二

機論上 馮用之

機者機也。經緯天下。織綜人事而已矣。機者微也。發之至微。用之至廣。大人行之。則合於道。細人竊之。則階於亂。合道所以濟世。階亂所以滅身。濟世。機之利者也。滅身。機之害者也。知利而不知害。雖去其害。害必就之。知害而不知利。雖就其利。利必違之。知利而知害。知去而知就。其惟聖人乎。文王武王。知機之君也。箕子周公。知機之臣也。夫三才設位。而機行乎其中矣。得之者昌。失之者亡。善用則集乎百祥。昧用則來乎百殃。故天之一發。龍蛇爲之起陸。人之一發。天地爲之反覆。范蠡善用也。勾踐以之克霸。無極昧用也。楚國於焉殄瘁。至哉斯術也。莫不以合義

爲本。趨時爲用。苟悖於義。則悅隨者寡。未逢於時。則虛其事。稽其取與離合之際。可謂神矣。雖離婁之目。不可視。烏獲之力。不可制。南金之利。不可斷。迅雷之聲。不可及。夫神器至重也。堯不與子而禪於舜。蓋取聖之機也。舜不讓丹朱而復禪禹。蓋取時之機也。兄弟至親。周公離於管蔡。取賢之機也。秦越之疏。嬴氏合於由余。取霸之機也。設令堯與丹朱而棄舜。億兆之心。竟歸於虞。則不謂之聖帝矣。舜忘大義而顧小節。不承堯而禪禹。則不謂之明君矣。周公昵管蔡而不戮。必墜文武之業。則不謂之賢臣矣。秦伯鄙由余而不用。必失四方之士。則不謂之霸主矣。天下雖聞之而不可知。雖見之而不可測。善爲國者。如偃師焉。民如幻也。欲之動。欲之靜。機在於我。豈當不悅乎。善爲君者。猶造父焉。人猶馬也。欲之東。欲之西。策在於我。豈有能違乎。經曰。不獨親其親。則天下皆親。不獨子其子。則天下皆子。富哉是機也。我以天下爲親爲子。天下孰不以我爲親爲子乎。惟然。故災害不生。禍亂不作。此聖人之旨也。則知欲安者。必先安於人。欲利者。必先利於人。能安人而人

不安之。能利人而人不利之者。未之有也。漢祖入關。不行殺戮。善安人也。秦室寶貨。悉分士卒。善利人也。卒收天下之心。享天下之富。此聖人之作也。項籍反。是而亡。不亦宜乎。善爲臣者。不厚於身而厚於君。不潤於室而潤於國。厚於君。忠也。潤於國。公也。既忠且公。君其薄之哉。民其怨之哉。祿位其去之哉。雖不厚於身。而身自厚矣。不潤於室。而室自潤矣。此君子之爲也。鄧侯處位而與淮陰。厚君者也。入秦不取金璧。而取圖籍。潤國者也。故能位冠三傑。聲流萬古。韓信忌剋。酈生殛。逐田橫。欲有功而自厚。貪賞而自潤。終貽伊感。雲夢生擒。夫域中至大之謂道。天下至賾之謂機。有道無機。守死而一身獨善。有機無道。好謀而彘倫攸斃。伯夷叔齊守死也。豈謂億兆塗炭。俟周武哉。李斯趙高。好謀也。豈知刑政酷毒。失民心哉。機道相須。盡善盡美。然而發機之要。實資於時。故進而得時。亦機也。退而得時。亦機也。取而得時。亦機也。捨而得時。亦機也。語而得時。亦機也。默而得時。亦機也。進得其時。則有利。伊尹于湯是也。退得其時。則無悶。二疏辭祿是也。取得其時。則必獲。

甘羅陟相是也。捨得其時則元吉。泰伯去吳是也。語得其時則見信。傳說是也。默得其時則保身。微子是也。故進不相時則凶。鼂錯所以見誅也。退不相時則禍。白起所以伏劍也。取不相時則招吝。許伐鄭也。捨不相時則有悔。虞棄虢也。語不相時則殆辱。薛冶諫其君也。默不相時則受謗。子家從其賊也。所以失之毫釐。差之千里。故君子得其機。則仇讎變爲心腹。況其恩者乎。失其機。則親昵反爲勍敵。況其疏者乎。齊桓用讎。能盡管仲之謀。九合諸侯。一匡天下。衛懿好鶴。失於臣下之望。國之有難。士卒不戰。夫如是。則一得一失。易於反掌。一興一亡。疾如旋踵。爲國家者。可不務乎。或曰。老氏云。以智治國。國之賊。不以智治國。國之福。然則智非機耶。機非智耶。答曰。機者。生於智者也。智者。隨其性者也。大人君子。得其遠者大者。爲而不有。功成不居。使天下熙熙然。若登春臺。如享太牢。不知帝力。故爲國之福。非謂其無慮無思。兀兀然如草木鳥獸。而能治國者也。細人曲士。得其小者近者。嗜欲繫焉。矜伐在焉。是非生焉。爭鬪興焉。故爲國之賊。聖人慮百世之後。善人少

而不善人多。垂此元言。蓋抑揚之旨也。且聖人不仁。以百姓爲芻狗。不仁之仁。豈非機耶。國不用機。以克永世。匪我攸聞。夫茫茫六經。萬機之圃。昭昭前史。萬機之鑑。仲尼云。知機其神乎。有旨哉。有旨哉。

權論下 馮用之

大哉。鼓天下之動。成天下之務。反於常而致治。達於道而合利。非權其孰能與於此乎。夫權者。適一時之變。非悠久之用。然則適變於一時。利在於悠久者也。聖人知道德有不可爲之時。禮義有不可施之時。刑名有不可威之時。由是濟之以權也。其或不可爲而爲。則禮義如畫餅充飢矣。不可施而施。則禮樂如說河濟渴矣。不可威而威。則刑名如治絲而棼矣。豈惟乖理。適足資亂。故用權之際。道德可棄。禮義可置。刑名可弛。及乎發號施令。如風偃草。衆知嚮方。莫敢不服。與夫道德禮義刑名之功。又何異哉。雖曰棄之置之弛之。蓋殊途而同歸也。故權者。國家之利器也。輜重可離。而權不可失。兵食可去。而權不可無。迅雷發則羣物驚。大風起則

萬彙振。嚴霜冽。則衆木落。遲日昇。則百卉秀。孰爲此者。曰天地也。天地尙或用之。而況於人乎。夫休祥不見。則中庸之君。不能力行而濟於聖。咎徵不作。則殘暴之主。不能革心而至於道。福其善。君子所以知勸。禍其淫。小人所以知戒。夫天之德。至仁也。地之道。無私也。至仁則不傷於物。何乃行肅殺之令乎。蓋秋不殺。則春無以生矣。無私則不黨於人。何乃垂災沴之變乎。蓋惡不瘳。則善無以彰矣。一弛一張。天道乃長。一懲一勸。天道乃遠。觀天之道。執天之行。盡矣。是以君子則而象之。體而行之。故當不合用而用。不合棄而棄。不合賞而賞。不合誅而誅者。皆從權而制宜也。聖人以神道設教。俾民日用而不知。權之時義大矣哉。高宗知傳說之賢。欲委之代天。取於皁隸之徒。儀於百辟之上。慮羣情弗協。事難以濟。故稱夢得賢相。乃刻像而求之。商之中興。賴善權之主也。文王知太公之賢。欲擢居輔弼。搜於屠釣之間。致於三公之上。庶士靡靡。恐未適從。故稱天遺我師。乃出畋而獲之。周之永年。賴善權之君也。此二君。苟懼設詐之損德。固執信而循常。則傳巖虛老而

莫伸。渭濱沒齒而不用。棟梁斯壞。其何以興。夫權之大端。在於利害而已矣。利萬而害一。害之何傷。害百而利十。利之必亡。苟害於事。雖鄙俚之議。君子懼之。苟利於後。雖先王興教。達人抗行也。子雖至親。西伯食其肉。不然。則死於姜里也。父雖至尊。沛公索其羹。不然。則臣於項籍也。西伯非不慈。蓋子已死。不食則己身亦斃。沛公非不孝。蓋其父爲虜。奔赴則己身亦降。又何益乎。能捨無益之慈孝。成莫大之基業。大人之權變。不可得而聞也。夫是非未明。向背未定。成敗未測。取與未決。當此之時。行權之時也。故權可以明是非。定向背。測成敗。決取與。穰苴布衣見景公。景公委之以兵柄。斬一寵臣。三軍畏懾。克成其功也。孫武被褐謁吳王。吳王試以教戰。戮三嬖妾。衆女整齊。卒顯其能也。易曰。巽以行權。巽。風也。風行也。無不可動之物。無不可往之所。權之用。無不可治之時。無不可成之事。昔晉文公見天王于河陽。譎則譎矣。而夾輔之勳。垂於史冊。鸞拳諫楚子以兵刃。悖則悖矣。而盡忠之節。著於春秋。夫事有先奪而後與。先順而後取。太甲不治。伊尹放之。俟其改過。